

# 1 Tetadönitenteidi

## inänite Pabodo çadota ante tänöta nänö yewæmongainta

*Pabodo, Waa quëwëedäni, ante apænecäimpa*

<sup>1</sup> Botö Pabodobo inömo imopa. Mönö töninäda Tidibänö tönö Tímoteo tönö godongämæ apænete ate yewæmömo aedäni. Mönö Mæmpo Wængongui nempo ayæ mönö Awënë Itota Codito nempo quëwëningue minitö Tetadönica iñömö quëwëningue Codito ingante godongämæ mini pönencabo ëñeedäni. Mönö Wængongui waadete pönö cæcä ate minitö gänë entawencæminimpa, ante yewæmömönipa.

*Tetadönitenteidi nani wede pönönö*

<sup>2</sup> Mönitö möni apæneyedë minitö tömämäni beyæ ante Wængongui ingante cöwë waa ate pönëningue apænemönipa. <sup>3</sup> Minitö Itota ingante æbänö wede pönente cæmïni imïnipa, ante ayæ tömengä ingante waadete pönëningue æbänö cæmïni imïnipa, ante cöwë apænemönipa. Ayæ minitö wæwëmïni incæ, Mönö Awënë Itota Codito pongä ate watapæ bacäimpa, ante pönëningue æbänö wæntæye inämaï ee cæmïni imïnipa, ante adingue mönitö Wængongui mönö Mæmpo weca æyedëmë ponte apænedingue cöwë mäninö ante pönëningue apænemönipa. <sup>4</sup> Mönitö töninämini, minitö Wængongui nänö në waademini inömïni inte ëñeedäni. Tömengä minitö imïnite apænte ængacäimpa, ante do ëñëmönipa. <sup>5</sup> Edæ Itota ingantedö ante mönitö watapæ möni apænedö ante wïi önonquedö ante apænetamönipa. Wæætë Wængongui nämä tæi piñænte në angä beyænque mönitö minitö imïnite apænedingue Awënë inte bai

apænetamönipa. Wængongui Önowoca mönitö tönö godongämæ cæcä beyænque mönitö mäninö möni watapæ apænedö ante, Nö impa, ante ædæmö pönëninque apænetamönipa. Mänömaï apænemöni ëñëmïni adinque mönitö, Wængongui mïnitö ïmïnite apænte ængacäimpa, ante do ëñëmönipa. Ayæ mïnitö weca quëwëninque mönitö æbänö mïnitö beyæ ante quëwentamönii, ante do ëñëmönipa.

<sup>6</sup> Wængongui Önowoca watapæ nänö topämo ante pönongä ænimïni inte mïnitö nanguï caate wæmïni incæte Wængongui nänö angainö ante ëñëninque Ao ante æmïnitapa. Mönitö æbänö cæmönii, ante adinque Awënë Itota Codito æbänö cæcää, ante adinque mïnitö adobaï möni cæbaï cæmïni bamïnitapa. <sup>7</sup> Ìninque Mäatedöniabæ quëwënäni tönö Acayabæ quëwënäni ïñömö Itota Codito ingante në pönënäni ïnönäni inte tömënäni tömänäni mïni cædi adinque mïni cæbaï adobaï cædänitapa. <sup>8</sup> Mïnitö wede pönëninque apænemïni beyænque Wængongui nänö angainö ante Mäatedöniabæ quëwënäni tönö Acayabæ quëwënäni ëñënäni incæte wïi mänïi mëñömongaque ïñömö quëwënäni ëñënänipa. Wæætë ædömë quëwënäni ïñönänite wadäni mïnitö Wængongui ingante mïni wede pönëmämo ante tededäni do ëñënänipa.

Ìninque mönitö mänïi beyæ quinante godömenque apænequïi. <sup>9</sup> Edæ, Mönitö mïnitö weca ëñacæ pöninque apænemöni ëñëninque mïnitö æbänö watapæ ëñëmïnitapa, ante mänïnäni në pönënäni incæ apænedäni ëñëmönipa. Ayæ adodäni mïnitö ïmïnitedö ante ïïmaï ante apænedänipa. Mïnitö, Mönitö wængonguïdi impa, ante mïni cönönincacoo incæ ëmö cæte wadæ pöninque mönö Wængongui gämænö pömïnitapa, ante apænedäni ëñëmönipa. Ayæ, Näwä Wængongui në Quëwënogä ingante ëñente

cæcæmönimpa, ante pöminitapa, ante apænedäni  
 ëñëmönipa. <sup>10</sup> Ayæ tömengä Wengä öönædë nê  
 quëwëngä inte ocæ ëmænte poncæcäimpa, ante minitö  
 wänö cömini iminipa, ante apænedäni ëñëmönipa.  
 Tömengä do wængaingä iñongante Wængonguï, Ñäni  
 ömæmöe, angä nê ñäni ömæmongaingä ingampa.  
 Ìninqe Wængonguï mönö imonte nänö piinte  
 panguimämo ante wæyömonte tömengä Wengä iñömö  
 ængä beyænque quëwenguimö imompa.

## 2

### *Pabodo Tetadönica iñömö nänö cædö*

<sup>1</sup> Mönitö tönïñamini ëñeedäni. Mönitö minitö  
 weca möni ëñacæ pöñedë möni cædinö wii önonque  
 impa, ante minitö do ëñëminimpa. <sup>2</sup> Mönitö do  
 mini ëñëninö bai mönitö wëñëñedë Pidipoto iñömö  
 quëwëñömönite mäniñömö quëwëñäni mönitö imönite  
 wënæ wënæ cædäni beyænque wæwente intamönipa.  
 Adodäni mönitö imönite, Minitö wënæ wënæ cæmini  
 iminipa, ante tedewëñäni ëñëninqe wætamönipa,  
 ante minitö adobai ëñëminipa. Ayæ minitö weca  
 ponte quëwëñömönite waodäni tæiyænäni mönitö  
 imönite Baa ante, Minitö apænedämaï incæminimpa,  
 ante wææ änäni incæte Wængonguï mönitö tönö  
 godongämæ cæcä beyænque tömengä ingantedö ante  
 watapæ möni apænedö ante minitö iminite guññenämaï  
 apæñetamönipa.

<sup>3</sup> Edæ mönitö, Wængonguï ingante pönëmini ininqe  
 waa imaimpa, ante minitö iminite nanguï apænemöni  
 inte wii babæ wapiticæ pönëninqe apænemönipa. Wii  
 wentamö entawëninqe pönente apænemönipa cæminii.  
 Ayæ adobai, Minitö oda cæcæminimpa, ante cædämaï  
 inte mönitö wii wapiticæ apænemönipa. <sup>4</sup> Wæætë  
 Wængonguï mönitö imönite apænedinque, Waa cæmini

abopa, äninque, Minitö Itota ingantedö ante botö watapæ apænedö ante nê apænemini êñencædänimpa, ante angä êñëninque mönitö nê apænemöni imönipa. Mönitö, Waodäni mönitö imönite waa acædänimpa, ante cædämaï inte wæætê, Wængonguinque mönitö imönite waa acæcäimpa, ante cædinque apænemönipa. Edæ tömengä, Æbänö entawëminii, ante mönö entawëñömö ante nê acä ingampa. <sup>5</sup> Wadäni nämä beyænque ante, Waa tedemöni êñëninque mönitö imönite wæætê pönö cæcædänimpa, ante babæ cædäni bai mönitö iñömö dicæ mänömaïnö ante mïnitö imïnite babæ cætamöniyaa. Mänömaïnö ante do êñëmïnipa. Ayæ, Mönitö wii mïnitö godonte æinta ante beyæ apænetamönipa, ante do êñëmïnipa. Æbänö cætamönipa, ante Wængongui nê acä ingampa. <sup>6</sup> Waodäni mönitö imönite waa acædänimpa, ante mönitö dicæ ämönitawogaa.

Ayæ, Minitö incæ wadäni incæ mönitö imönite waa acædänimpa, ante dicæ ämönitawogaa. <sup>7</sup> Edæ, Itota Codito nänö da godongaïmöni inömöni inte mönitö mïnitö imïnite, Pönömïni æninque quëwencæmönimpa, ämöni bai waa incædönimpa. Wæætê mïnitö weca quëwëninque mönitö wäänä nänö wëñænäni guiyanäni inänite ædæmö cædä bai adobaï mïnitö imïnite cætamönipa. <sup>8</sup> Minitö imïnite nanguï pönï waadete pönëmöni inte mönitö, Itota ingantedö ante Wængongui nänö watapæ apænedö ante mïnitö imïnite apænedinque watapæ totamönipa. Ayæ mïnitö nö möni nê waademïni iñöminite mönitö mïnitö beyæ quëwentamönipa. Ayæ mïnitö beyæ wæmöni incæ adobaï watapæ tobaïmönipa. <sup>9</sup> Mönitö tönïñamïni êñëedäni. Nanguï pönï möni cædinö ante mïnitö do êñëmïnipa. Itota ingantedö ante Wængongui nänö watapæ apænedö ante mönitö mïnitö weca quëwente apænedinque, Möni quëwengäimpa, ante wii eyepæ godö wædö ante dicæ antamöniyaa. Wæætê

edæ, Mīnitō wædāmaī incæminimpa, ante mōnitō itædē incæ woyowotæ incæ tōmēmōni nanguī cædinque ænte quēwentamōnipa.

<sup>10</sup> Mīnitō nē wede pōnēmīni weca quēwēninque mōnitō tæiyæ waēmō ewocamōni inte nō cæte quēwēñōmōnite mīnitō, Wēnæ wēnæ cæminipa, ante ædō cæte anguīmīni. Wæætē mōnitō cædinō adinque mīnitō, Mōnitō æbānō quēwēmōni imōnii, ante do amīni inte nē apænemīni iminipa. Wængonguī adobaī ante do acā ingampa. <sup>11</sup> Edæ waocā mæmpocā tōmengā wēñænāni iñōnānite tōmengā, Mīnitō ēñenguīmīni, ante odō-mongā baī mōnitō adobaī mīnitō tōmāmīni iñōmīnite adocanque adocanque ingante, Bitō ēñenguīmi, ante odōmonte apænetamōnipa. Mänōmaī cætāmōnipa, ante mīnitō do ēñēmīnipa. <sup>12</sup> Mīni quēwēnō adinque Wængonguī tocæcāimpa, ante cædinque mīnitō tæiyæ waēmō quēwencæminimpa, ante mōnitō nanguī apænetamōnipa. Ayæ, mīnitō mänōmaī cæte quēwencæminimpa, ante waadete apænetamōnipa. Ayæ adobaī mōnitō wæætē wæætē apænedinque mīnitō imīnite adodō ante anca apænetamōnipa. Wængonguī iñōmō, Botō Awēnē Odeye nempo quēwēninque mīnitō botō ñäō emōñōmō botō tōnō godongāmæ quēwencæminimpa, ante tōmengā mīnitō imīnite aa pedinque apænte ængampa.

<sup>13</sup> Ayæ adobaī mōnitō Wængonguī nänō angainō ante mīnitō imīnite apænemōni ēñēninque mīnitō ō ænte do pōnēmīnitapa. Nāwangā Wængonguī nänō angainō impa, ante adinque mīnitō, Wīi waodānique nāni angainō impa, ante pōnēninque wæætē, Nāwangā Wængonguī nänō angainō impa, ante pōnēninque ō æmīnitapa. In-  
 inque mīnitō nē wede pōnēmīni inte Wængonguī nänō angainō entawēmīni beyænque nanguī cæmīni iminipa, ante ēñēninque mōnitō Wængonguī ingante cōwē waa ate pōnente apænemōnipa. <sup>14</sup> Oodeabæ iñōmō Wæn-

gonguï ingante godongämæ nani pönencabo iñömö tö-mengä nempo quëwëñönänite oodeoidi tömënäni inänite togænte pänäni wädäni bai mīnitō mōnitō tōniñamīni iñōmīni mīnitō ömæ iñömö nē quëwënäni incæ mīnitō imīnite adobai cädäni wæmīnitapa. Mänömaï cädäni wædinque mīnitō Oodeabæ iñömö Wængonguï ingante godongämæ nani pönencabo wädäni bai adobai wæmīni bamīnitapa.

<sup>15</sup> Oodeoidi iñömö Wængonguï beyæ nē apænegaïnäni inänite wænönäni wængadänimpa. Ayæ ate tömënäni pæinäni iñömö Itota Codito ingante wænönäni wængacäimpa. Ayæ ñowodäni adocabodäni incæ mōnitō imōnite adobai togænte wido cädänitapa. Mäninäni nani cædinö adinque Wængonguï tömënäni inänite ædö cæte waa aquingää. Adodäni incæ waodäni tömänäni inänite piinte quëwënönänimpa töö. <sup>16</sup> Edæ oodeoidi inämaï inäni inänite, Codito ængä beyænque mīnitō quëwencæmīnimpapa, ante apænedämaï incæmīnimpapa, ante cæcæte ante mäninäni oodeoidi incæ mōnitō imōnite Baa äninque wææ cädänipa töö. Mänömaï cöwë wënæ wënæ cædinque tömënäni wæætë wæætë nani wënæ wënæ cædincoo idæwaa cädänipa. Idæwaa i in-ique Wængonguï nänö ænguï bate piimämo tömënäniya do pongatimpapa.

*Tetadönitenteidi weca Pabodo ëñacæ pöinente wæcampapa*

<sup>17</sup> Incæte mōnitō tōniñamīni ëñeedäni. Tömënäni änäni beyæ mōnitō mīnitō imīnite ëmö cæte godinque wii wantæpiyæ ante gotamönipa. Godinque mīnitō imīnite adämaï imōni incæte mōnitō mīnitō beyæ ante cöwë pönentamönipa. Mīnitō imīnite nanguï aïnente wæmōni inte mōnitō, Æbänö cæte goquimōnii, ante pönëninque nanguï cætamönipa. <sup>18</sup> Edæ mīnitō weca pöinente wæ-tamönipa. Botö Pabodobo inömo inte wæætë wæætë

nö pöinemo intabopa. Mönitö pöinömöni incæte Tatäna wæætë mönitö imönite wææ cæcä wætamönipa. <sup>19</sup> Mönö Itota Codito nänö ponguiönæ tömengä weca ongön-  
 inque mönitö æbänö ante beyæ watapæ bacæimpa, ante  
 pönömöni imönii. Wii mīnitö beyænque toquimönii. Edæ  
 nē pönēmīni inömīni inte mīnitö do möni nē watapæ  
 todömīni imīnitapa. Ayæ waodäni tæi emonte gänä  
 cædinque poganta ænte todäni bai mīnitö beyænque ante  
 mönitö nē toquimöni imönipa. <sup>20</sup> Näwangä impa. Waa  
 pönī cæmīni ininque mīnitö möni nē waa amīni inömīni  
 inte möni nē watapæ todömīni iminipa.

### 3

<sup>1</sup> Mänömaï beyæ mönitö, Mīnitö imīnite adāmaï inte  
 awædö, äninque, Ædö cæte godömenque wänö cömöni  
 inguimönii, ante pönëninque mönatö adomönaque Atëna  
 iñömö ongonguënëmöna imönapa, ante pönente wæ-  
 tamönapa. <sup>2</sup> Ayæ Timoteo nē mönö tönīñacä ingante  
 mīnitö weca ante da pönömöna pongantapa. Tömengä  
 iñömö Wængongui tönö godongämæ cædongä iñon-  
 gante Itota mönö Codito ingantedö ante mönö wat-  
 apæ apænedö ante ëñencædänimpa, ante odömonte  
 apænedongä ingampa. Tömengä mīnitö imīnite, Mīni  
 wede pönënö ante tæi ongonte quëwëedäni, ante ayæ,  
 Wampo pönëninque tæi piñænte cædäni, ante ædæmö  
 apænecæcäimpa, ante mönatö tömengä ingante da  
 pönömöna pongantapa. <sup>3</sup> Wadäni mīnitö imīnite quiëmë  
 cædäni caate wæmīni incæte tömämīni wadö pönënāmaï  
 inte ñimpo cædāmaï incæmīnimpa, ante cædinque Tī-  
 moteo ingante da pönömöna pongantapa. Mönö imonte  
 cöwë mänömaï cædäni caate wæquënëmö imompa, ante  
 mīnitö do edonque pönī ëñëmīnipa. <sup>4</sup> Ayæ mīnitö weca  
 möni quëwëñedë mönitö mīnitö imīnite apænedinque,

Mönö imonte quiëmë bai togænte panguinänidö anguënë, ante wæætë wæætë apænetamönipa. Edæ minitö ëñenö bai mäninö do batimpa. <sup>5</sup> Mänömaï beyæ botö, Ædö cæte godömenque wänö cömo inguimoo, ante, Mïni wede pönënö æbänö impa, ante botö ëñencæboimpa, ante Tïmoteo ingante da pönömo pongantapa. Wënæ awënë, Oda cæe, ante në anewëngä ïñömö minitö iminite, Oda cæedäni, angä ëñëninque minitö wabänö ëñëminimpa, ante botö ancai guiñente wætabopa. Mänömaï ëñente cæmïni ïninqe mönitö cædinö wo ewente babaimpa, ante pönentabopa.

<sup>6</sup> Incæte Tïmoteo minitö weca quëwëninque ñöwoque mönitö weca ocæ ëmænte pongantapa. Mïni wede pönënö ante apænedinque tömengä, Wede pönënanipa, angantapa. Ayæ, Në waadete pönënanï ïnanipa, ante apænecä ëñentamönapa. Minitö mönatö beyæ cöwë waa pönëmïni imïnipa, ante tömengä apænecä ëñentamönapa. Ayæ mönatö minitö iminite aïnëmöna inte wämöna bai minitö adobaï mönatö imönate aïnëmïni inte wämïni imïnipa, angantapa. <sup>7</sup> Mänömaï beyæ mönitö tönïñamïni ëñëedäni. Quiëmë beyæ wämöna incæ ayæ mönatö imönate togænte pänäni wæwëmöna incæte mönatö mïni wede pönënö beyænque wæætë wampo pönente batamönapa. <sup>8</sup> Minitö mönö Awënë ingante ñimpo cædämaï pönëmïni beyænque mönatö ñöwo wampo pönente bai quëwëmöna imönapa. <sup>9</sup> Mönatö mönö Mæmpo Wængongui weca ongöninque minitö beyæ nangui watapæ tomöna inte wæætë apænemönapa. Incæte minitö beyæ ante Wængongui ingante ædö cæte waa ate pönente eyepæ apænequimönaa. <sup>10</sup> Minitö mïni wede pönënö ante æbänö ayæ wïi eyepæ pönëmïni, ante wämönipa. ïninqe, Minitö iminite wæætë adinque mönitö odömonte apænemöni ëñëninque minitö eyepæ pönencæminimpa, ante cædinque mönitö woyowotæ



itädē Wængonguī ingante nō nanguī pōni apænemōni imōnipa.

<sup>11</sup> Wængonguī mōnō Mæmpo incæ mōnō Awënë Itota Codito tōnō mōni goquīnō ante tōinō pīnonte bai cæda ate mīnitō weca gocæmōnimpa. <sup>12</sup> Mōnitō mīnitō imīnite godōmenque waadete pōnēmōni bai mōnō Awënë Itota pōnō cæcā ate mīnitō adobai mīnitō weca wacā ingā wacā ingā godōmenque godōmenque waadete pōnencæmīnimpa, ämōnipa. Ayæ waodāni tōmānāni inānite godōmenque waadete pōnencæmīnimpa, ämōnipa. <sup>13</sup> Tōmengā pōnō cæcā beyænque mīnitō tæimō entawente incæmīnimpa, ämōnipa. Edæ mōnō Awënë Itota quīnāni nē tæiyæ waēmō ewocadāni tōmānāni tōmengā tōnō godongāmæ poncædānimpa. Tōmēnāni nāni pōnedē mīnitō iñōmō Wængonguī mōnō Mæmpo weca pōmīni adinque tōmengā ædō cæte, Wēnæ wēnæ cæmīni imīnipa, ante anguingāā. Mīnitō tæiyæ waēmō ewocamīni incæmīnimpa, ämōnipa.

## 4

### *Wængonguī waa acæcāimpa, ante mōnō quēwēnō ante*

<sup>1</sup> Mōnitō tōniñamīni ēñēedāni. Adodeque ayæ apænequīmōni imōnipa. Mīni quēwēnō ante Wængonguī waa acæcāimpa, ante mōnitō, ĩmaī quēwēedāni, ante do wææ odōmonte apænemōni ēñēmīnitawo. ĩnīnque mīnitō Ao ante quēwēnōmīni imīnipa. Nōwo iñōmō mōnitō Awënë Itota emōwo ante apænedinque mīnitō imīnite, Mānīnonque ante gomonga cæte quēwencæmīnimpa, ante ancaa apænemōnipa.

<sup>2</sup> Awënë Itota nānō änō ante ēñēnte cædinque mōnitō mīnitō imīnite wææ änīnque, ĩmaī cæedāni, antamōnipa. Mānīnō mōni wææ ante odōmonte apænedō ante mīnitō do ēñēnimīnipa. <sup>3</sup> Wængonguī nānō änō iñōmō ĩmaī

impa. Minitö iñömö tæiyæ waëmö ewocate quëwen-guënëmïni iminipa. Wacä nänöogæ ingante godö towente cædämaï inte edæ önonque mini nänöogænque quëwen-guënëmïni iminipa. <sup>4</sup> Onguiñämïni tömämïni iñömö, Botö moncæboimpa, ante cædinque minitö, Æbänö cæte nänöogæ æmo ate Wængongui tönö waodäni waa aquinäni, ante ëñenguënëmïni iminipa. Minitö, Tæiyæ waëmö ewocadinque ængæimpa, ante ëñenguënëmïni iminipa. <sup>5</sup> Wïi wadäni bai, Wængongui ingante æbänö ingaingä ingää, ante ëñënämaï inäni bai onquiyænque ante näni towënonque ante pönënämaï quëwencæminimpa. <sup>6</sup> Mäninö ante nê pönengä iñömö, Botö töninçä nänöogængä ingampa, ante pönëninque tömengä nänöogæ ingante towente cædämaï ininque tömengä ingante wënæ wënæ cædämaï incæcäimpa.

Ïimaï wënæ wënæ cædäni inänite Awënë Itota pancæcäimpa. Wëenëñedë mäninö ante minitö iminite apænedinque do wææ angamönimpa. <sup>7</sup> Edæ Wængongui mönö imonte wïi, Towencæminimpa, ante apænte ængacäimpa. Wæætë, Minitö tæiyæ waëmö ewocate quëwencæminimpa, ante tömengä mönö imonte apænte ængacäimpa. <sup>8</sup> Mänömaï beyæ æcänö mäninö ante Pabodo nänö, Ïimaï cæedäni, ante nänö wææ odömonte apænedö ëñëninque Baa äna iñömö tömengä wïi waodänique inänite ëñënämaï inte Baa angä ingampa. Wæætë Wængongui minitö iminite nänö Tæiyæ Waëmö Önowoca nê pönongä ingante ëñënämaï inte Baa angä apa quëwëmïni.

<sup>9</sup> Mini pönencabo mini töninçadäni iñönänite mïni waadete pönënö ante mönitö quïnante yewæmonguimönii. Edæ minitö tömëmïni iminite, Wacä ingä wacä ingä waadete pönencæminimpa, ante Wængongui odömonte apæneçä ëñëmïnitapa töö. <sup>10</sup> Nö impa. Mäatedöniabæ tömämæ iñömö mönö

pönencabo mönö tönĩñadäni tömänäni inänite do waadete pönemini iminipa. Incæte möni tönĩñamini, Minitö mäninö ante gomonga cæte quëwencæminimpa, ante ancaa apænemönipa. <sup>11</sup> Minitö piyænë cæte quëwencæminimpa. Wadäni, Æbänö cæquënänäni inänii, ante cöwë änämaï incæminimpa. Ayæ, Wæntæye inämaï inte mini önopoca cæte quëwencæminimpa. Mäninö do möni apænedö bai minitö, Cæinëmönipa, ante cæcæminimpa, ämönipa. <sup>12</sup> Mänömaï cæmini bai iimö iñö iimö iñö mini quëwënö adinque wadäni në pönänämaï inäni wæætë minitö iminite waa acädänimpa. Ayæ adobaï minitö waodäni inänite, Pönömïni æncæmönimpa, ante änewänämaï quëwencæminimpa.

*Mönö Awënë Itota nänö ocæ emænte ponguiönæ*

<sup>13</sup> Mönitö tönĩñamini ëñeedäni. Në æmæwo wængainäni iñömö æbänö baquinänii, ante minitö ëñencæminimpa, ante yewæmömönipa. Wadäni, Mönö ñäni ömæmongæimpa, ante pönänämaï inäni inte wæwänäni bai minitö wii adobaï wæwëmini incæminimpa, ante yewæmömönipa. <sup>14</sup> Itota æmæwo wæningä incæ ñäni ömæmonte inongäimpa, ante pönëmö imompa. Itota ingante pönente në wængainäni iñönänite Wængongui iñömö mäninäni inänite Itota tönö tömengä weca ænte mämongä poncädänimpa, ante adobaï pönëmompa.

<sup>15</sup> Wængongui nänö apænedö bai mönitö iimäi ante minitö iminite apænemönipa. Awënë Itota nänö ponguiönæ mönö në miimö quëwëmö inte ayæ ongömö iñömö mönö wii täno tömengä weca gocæmöimpa. Wæætë tömengä ingante pönëninge në æmæwo wængainäni inte mäninäni iñömö täno goquinänidö angüënë. <sup>16</sup> Edæ mönö Awënë Wængongui nänö wææ änonque ante yedæ äñongä Wængongui anquedoidi tæiyæ awënë aa pecæcäimpa. Wængongui todompeta nani ancadeca adocanque we

we öoncæ cæyongä mönö Awënë Codito incæ öönädë quëwente pö wææncæcäimpa. Pö wææñongä tömengä ingante në pönente wængainäni tömënäni täno ñäni ömämoncædänimpa. <sup>17</sup> Ayæ ate Wængongui cæcä beyænque mönö në mïmï quëwëmö inte ayæ ongömö iñömö mönö tömënäni tönö godongämæ boguïmancodë æicæmöimpa. Boguïmancodë æidinqe mönö Awënë öönädë inö wææ pöñongante mönö tömengä ingante bee tencæmöimpa. Ìninqe cöwë Awënë weca quëwencæmöimpa. <sup>18</sup> Mänömaï beyæ, Mönö Awënë Codito incæ öönädë quëwente pö wææncæcäimpa, ante pönëninque wampo pönencædänimpa, ante cædinque mïnitö wacä ingä wacä ingä ædæmö apæneedäni.

## 5

<sup>1</sup> Ñöwo mönitö tönïñamïni ëñëedäni. Æönädö mänïï baquïï, ante mïnitö imïnite ædö cæte yewæmonguïmönii. <sup>2</sup> Edæ mönö Awënë Itota nänö ponguïönæ iñömö në awëmö ængä woyowotæ iñontobæ pö guicä bai iñontobæ baquïnö angüënë, ante mïnitö tömëmïni waa ëñëmïnipa edæ. <sup>3</sup> Waodäni, Mönö piyænë cæte guïñënämaï quëwë-mompa, ante näni tedeyedë ënengä iñontobæ wëñæ nantate wæcä bai tömënäni adobai iñontobæ näni ömäe ëwenguïnö baquïnö angüënë. Ìninqe ædö cæte wodii winonguïñäni.

<sup>4</sup> Incæte mïnitö mönitö tönïñamïni ëñëedäni. Mänïönæ näni wæwente eönæ në awëmö ænongä pö guicä bai iñontobæ iinqe bayonte mïnitö wïi wëmö iñömö quëwëmïni inte guïñënämaï incæmïnipa. <sup>5</sup> Mïnitö Wængongui wëñæmïni imïni ìninqe ñäö iñömö tömämïni quëwëmïni imïnipa. Mönö cöwë wentamö iñömö cædönäni bai wïi imöimpa. <sup>6</sup> Mänömaï beyæ mönö wïi wadäni mö ñönäni bai mongæimpa. Wæætë mönö ñäni ömæmöninqe nämä wææ ante quëwëmö

ingäimpa. <sup>7</sup> Edæ tömënäni në mönäni iñömö woyowotæ mönäni inänipa. Ayæ wadäni ti nämæ bedinque në quidi quidi dowænte inäni iñömö woyowotæ bete badänipa. <sup>8</sup> Incæte mönö ñäö iñömö cægömö inte nämä wææ ante quëwëmö ingäimpa. Tæineta wææ wëñate bai cædinque Itota ingante mönö wede pönënö ante mönö waadete pönënö ante mönö entawente quëwengäimpa. Tæineta ocabogata wææ encate bai cædinque mönö edæ, Wængongui ængä beyænque quëwencæmöimpa, ante pönënö ante mönö éwocate quëwengäimpa. <sup>9</sup> Edæ Wængongui nänö ængui bate piinguimämo ante tömengä, Wi wæwencæminimpa, ante mönö imonte apænte ængacäimpa. Wææté mönö Awënë Itota beyæ tömengä mönö imonte ængä beyænque quëwencæmöimpa. <sup>10</sup> Tömengä, Botö tönö quëwencæminimpa, ante mönö beyæ wængacäimpa. Ininque miï imö incæ wænte imö incæ mönö cöwë tömengä weca quëwencæmöimpa. <sup>11</sup> Mänömaï beyæ minitö iñömö do cæmïni bai gomonga cæedäni. Wampo pönencædänimpa, ante cædinque minitö wacä ingä wacä ingä ædæmö apænedinque, Æmæwo pægaïmïni inte tæi piñænte cæedäni, ante odömonte apæneedäni.

### *Mönö tönïñadäni inänite Pabodo nänö änö*

<sup>12</sup> Nöwo mönitö tönïñamïni ëñeedäni. Minitö iminite iïmaï apænemönipa. Minitö weca në nanguï odömonte apænedäni iñönänite minitö tömënäni inänite waa acæminimpa, ämönipa. Edæ Awënë Itota apænte nänö æninäni inte tömënäni, Minitö iïmaï waa quëwëedäni, ante minitö iminite në aadäni inänipa. <sup>13</sup> Tömënäni nani cædö beyænque minitö tömënäni inänite godömenque nanguï waa amïni inte waadete pönëedäni. Minitö wacä ingä wacä ingä piyænë cæte quëwëedäni.

<sup>14</sup> Mönitö tönĩñamĩni ěñeedāni. Mĩnitö ĩmĩnite ĩĩmaĩ ante anca ģmönĩpa. Wæntæye ĩnāni ĩnānite wææ ante apæneedāni. Guĩñente ĩnāni wampo pönencædānĩpa, ante tømēnāni ĩnānite ædæmō apæneedāni. Æmæ pönēnāni tönō godongāmæ cæedāni. Wadāni tømānāni ĩnānite mĩnitö waadete ee cæedāni ģmönĩpa.

<sup>15</sup> Æcāmenque ĩngante wadāni wēnæ wēnæ cædāni adĩnque mĩnitö Baa ģmĩni beyænque mānĩnāni wææt-edō wæætē nāēmæ wēnæ wēnæ cædāmaĩ incædānĩpa. Wæætē wacā ĩngā wacā ĩngā cōwē waa cæcæmönĩpa, ante pönēnĩnque cæedāni. Ayæ wadāni tømānāni ĩnānite adobaĩ cæedāni.

<sup>16</sup> Mĩnitö cōwē watapæ tote quēwēedāni.

<sup>17</sup> Wængonguĩ ĩngante woyowotæ itædē apænete quēwēedāni. <sup>18</sup> Mĩni quēwenganca quĩēmē baĩ ba incæte mĩnitö cōwē Wængonguĩ ĩngante waa ate pönēnĩnque apæneedāni. Edæ Itota Codito nempo nē quēwēmĩni inte mānĩnō ante mĩnitö beyæ ante Wængonguĩ nānō ānō ĩpa.

<sup>19</sup> Wængonguĩ Ōnōwoca nānō cæĩnō adĩnque mĩnitö tømēngā ĩngante ædō cæte, Cædāmaĩ ĩe, ante wææ anguĩmĩni. <sup>20</sup> Wængonguĩ beyæ nē apænedāni nāni apænedō ěñēnĩnque mĩnitö badete todāmaĩ quēwēedāni.

<sup>21</sup> Wæætē waodāni nāni apænedō tømānō ante ěñēnĩnque, Æbānō ĩ, ante edonque ěñēngæĩpa, ante cædĩnque mĩnitö, Nō nāni ānō ĩ, Babæ nāni ānō ĩ, ante pönēnĩnque do ěñēncæmĩnĩpa. Waa ānō ĩpa, ante ěñēnĩnque mĩnitö mānĩnō ante ō ænte baĩ quēwēedāni.

<sup>22</sup> Quĩēmē wēnæ wēnæ cæquĩ, ante adĩnque mĩnitö Baa ante gomō aedāni.

<sup>23</sup> Wængonguĩ incæ nē piyænē cædongā inte pönō cæcā beyænque ædæmō tæiyæ waēmō entawēmĩni incæmĩnĩpa. Awēnē Itota mōnō Codito tømēngā nānō ponguĩnganca mĩnitö ĩñōmō Wængonguĩ pönō cæcā ate

mīnitō mīmō incæ önōwoca incæ baonga incæ wēnæ wēnæ cædāmaī incæmīnīmpa. <sup>24</sup> Wængonguī nānō nē apænte ænīmīni iñōmīnite tōmengä mīnitō imīnite cōwē pōnēnīnque tōmengä nānō änō bai ædæmō cæcæcāīmpa.

*Pabodo, Waa quēwencæmīnīmpa, angampa*

<sup>25</sup> Mōnitō tōnīñamīni iñōmō ēñēedāni. Mīnitō mōnitō beyæ ante Wængonguī ingante apæneedāni.

<sup>26</sup> Mīnitō pōnencabo iñōmīnite mōnitō tōmāmīni waa quēwencæmīnīmpa, ante waadete pōnēnīnque ämōnīpa.

<sup>27</sup> Edæ Awēnē Itota ēñēñongä botō mīnitō imīnite wææ ante, īi yewæmōīnta adīnque mīnitō mīni pōnencabo iñōmīnite adocanque ingante ämīni tōmānāni ēñēñōnāni tōmengä adotaa adīnque apænecä ēñencædānīmpa, ämōpa. <sup>28</sup> Awēnē Itota mōnō Codito mīnitō imīnite waadete pōnō cæcæcāīmpa, ante botō mānīnque ante yewæmōmōpa.

Wængongui nänö Apänegainö  
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



